

Serie A N.º 1176160

SESIÓN ORDINARIA DO CONCELLO PLENO**24/OUTUBRO/2002****ORDE DO DÍA**

- 1.- APROBACIÓN ACTA SESIÓN ANTERIOR
- 2.- ACTIVIDADE DE CONTROL DO PLENO.
- 3.- DAR CONTA DE RESOLUCIÓN DA ALCALDÍA.
- 4.- DAR CONTA DE EXPEDIENTES DE MODIFICACIÓN DE CRÉDITOS.
- 5.- DICTAME DA COMISIÓN INFORMATIVA DE BENESTAR SOCIAL E XUVENTUDE EN RELACIÓN CON APROBACIÓN CONVENIO COA SOCIEDADE DE TRABALLO ASOCIADO DE AXUDA Ó ENFERMO PSÍQUICO LENDA.
- 6.- DICTAME DA COMISIÓN INFORMATIVA DE BENESTAR SOCIAL E XUVENTUDE EN RELACIÓN CON APROBACIÓN CONVENIO COA ASOCIACIÓN "ANDAINA"
- 7.- DICTAME DA COMISIÓN INFORMATIVA DE DEPORTES REFERENTE A RATIFICACIÓN DE RESOLUCIÓN DA ALCALDÍA SOBRE MODIFICACIÓN DO PRAZO DE PRÓRROGA DO CONTRATO ASINADO COA EMPRESA SERVIICIO S.L.
- 8.- MOCIÓN DO B.N.G. SOBRE AS LISTAS DE ESPERA DO SERGAS.
- 9.- MOCIÓN DO B.N.G. SOBRE O ATAQUE DOS EEUU AO IRAQUE

ROGOS E PREGUNTAS.

ASUNTOS FORA DA ORDE DO DÍA

Na Casa do Concello de Redondela, sendo as vinte horas e catro minutos do día **vintecatro de outubro do ano dous mil dous**, baixo a Presidencia do Sr. Alcalde-Presidente D. XAIME REI BARREIRO, e a asistencia dos/as Sres/as Concelleiros/as: D. MANUEL JAVIER NÚÑEZ SALGADO, D. EMILIO GONZÁLEZ IGLESIAS, DONA M^a DEL PILAR MARTÍNEZ GONZÁLEZ, DONA M^a DEL CARMEN RODRÍGUEZ CUNHA, D. ALEJANDRO BASTOS FERNÁNDEZ, D. MANUEL IGLESIAS CARRERA, D. CARLOS GONZÁLEZ FERNÁNDEZ, D. JOSE GARCIA MÍGUEZ, D. MANUEL RAMÓN CONDE ROMERO, DONA AURORA ALONSO MONTEAGUDO, D. EMILIO SÁNCHEZ SANTORIO, D. JOSE LUIS ALONSO BASTOS, D. MANUEL PUENTES SAAVEDRA, D. LUIS MÍGUEZ BOULLOSA, D. PABLO REBANAL ALFAYA, D. SALVADOR FERMIN PINTOS FERNANDEZ, D. XOSÉ CARLOS PAZOS DOCAMPO, DONA CECILIA PÉREZ ORGE, D. XOSÉ LUIS GRANDE GRANDE e DONA ROSA

COSTAS ESTÉVEZ, asiste tamén D. MODESTO SOLLA SANZ, Interventor do Concello, actuando como Secretario D. Bernardo Soto López, Secretario accidental da Corporación, constitúese o Pleno do Concello, en sesión ordinaria, conforme á convocatoria e de acordo coa a Orde do día.

A Presidencia declara aberta a sesión en primeira convocatoria, procedéndose a tratar os puntos da Orde do Día.

1.-APROBACIÓN ACTA SESIÓN ANTERIOR

Dada conta pola Presidencia da acta da sesión celebrada con carácter ordinario o día 19 de setembro de 2002, o Concello Pleno en votación ordinaria e por maioría dos seus membros presentes, sendo dezanove votos a favor (9 do Psde G-PSOE, 4 do BNG e 6 do PP) e dúas abstencións, a do Sr. Conde Romero e a Sra. Alonso Monteagudo, por, manifestan non ter asistido á referida sesión, acorda prestarlle a súa aprobación sen formular observación algunha.

2.-ACTIVIDADE DE CONTROL DO PLENO.

Non se exercitou ningún tipo de actividade de control.

3.-DAR CONTA DE RESOLUCIÓN DA ALCALDÍA.

Pola Presidencia dase conta das Resolucións da Alcaldía dende o día 17 de setembro de 2002 ó 18 de outubro de 2002.

INTERVENCIÓNS:

Sr. Conde Romero: Fai referencia á Resolución da Alcaldía pola que se adxudican as obras de reposición de servizos afectados na travesía de Reboreda, indicando que deberían ter sido contratados mediante concurso e non a través do procedemento que se seguiu. O Sr. Alcalde manifestalle que existen informes no expediente ó respecto.

De seguido o Sr. Conde Romero fai referencia a unha Resolución da Alcaldía de data 19 de setembro pola que se anulan determinados recibos do lixo indicándose como causa "sin servicio". Pregunta que se entende por sin servicio.

Contestalle a Sr. Martínez González no senso de que non se trata de que non teñan servizo, senón lonxe e non axeitado, e a máis de 200 metros non pagan, segundo a normativa que hai no Concello.

O Concello Pleno quedou enterado do contido das Resolucións dictadas.

4.-DAR CONTA DE EXPEDIENTES DE MODIFICACIÓN DE CRÉDITOS.

O Concello Pleno quedou enterado dos expedientes de modificación de créditos números 22, 24, 25, 26, 27, 28 e 29 correspondente o exercicio 2002.

5.-DICTAME DA COMISIÓN INFORMATIVA DE BENESTAR SOCIAL E



NUMERADO
CORPORACIÓN
LOCAIS

Serie A N.º 1176161

XUVENTUDE EN RELACIÓN CON APROBACIÓN CONVENIO COA
SOCIEDADE DE TRABALLO ASOCIADO DE AXUDA Ó ENFERMO PSÍQUICO
LEND.

ANTECEDENTES

Proposta da Concelleira de Benestar Social e Xuventude dictaminada favorablemente pola Comisión Informativa de data 20 de setembro de 2002, que transcrita di:

"Visto o Convenio asinado entre o Ilmo. Concello de Redondela Coa Sociedade de Traballo Asociado de Axuda ó Enfermo Psíquico "LEND", en data 12 de agosto do presente ano e

Vistos os informes emitidos por Secretaría de data 15 de maio de 2002 e polo Sr. Interventor Rfª: T97/02 de data 12 de xuño de 2002, obrantes no expediente,

Esta Concelleira

PROPÓN

Primeiro.- Salvar os reparos formulados polo Sr. Interventor no seu informe de data 10 de xuño de 2002, Rfª: T97/02.

Segundo.- Aprobar polo Concello Pleno o Convenio asinado entre o Concello de Redondela e a Sociedade de Traballo Asociado de Axuda ó Enfermo Psíquico LENDA do que é a súa presidenta Dona Pilar Rey Fernández con DNI núm. 36.248.011-G, no que se fixa unha aportación de 6.611, 134 euros.

Terceiro.- Retrotraer os efectos do Convenio á data de 1 de xaneiro de 2002".

VOTACIÓN E ACORDO: O Concello Pleno, por unanimidade dos seus membros presentes, sendo vinte e un votos a favor (9 do PSdeG-PSOE, 4 do BNG, e 8 do PP), **acorda** aprobar a proposta antes transcrita.

6.-DICTAME DA COMISIÓN INFORMATIVA DE BENESTAR SOCIAL E
XUVENTUDE EN RELACIÓN CON APROBACIÓN CONVENIO COA
ASOCIACIÓN "ANDAINA"

Dada conta pola Presidencia do dictame referente o asunto epigrafiado, intervéñen o Sr. González Iglesias que manifesta que o informe da Secretaría Xeral do Concello, por error, é negativo, polo que debe revisalo en canto se incorpore o seu posto de traballo.

O Sr. Rebanal Alfaya di que comentou o informe coa Secretaría, e que non hai error.

VOTACIÓN E ACORDO: O Concello Pleno por unanimidade dos seus membros presentes **acorda** deixar o asunto sobre a Mesa.

7.- DICTAME DA COMISIÓN INFORMATIVA DE DEPORTES REFERENTE A RATIFICACIÓN DE RESOLUCIÓN DA ALCALDÍA SOBRE MODIFICACIÓN DO PRAZO DE PRÓRROGA DO CONTRATO ASINADO COA EMPRESA SERVIICIO S.L.

ANTECEDENTES

Resolución da Alcaldía sobre modificación do prazo de prórroga do contrato asinado coa empresa Serviocio S.L, dictaminada favorablemente pola Comisión Informativa de Deportes en data 18 de outubro de 2002, que transcrita dí:

"ANTECEDENTES

1º.- Acordo do Concello Pleno de data 26 de Marzo de 1999 polo que se aproba a adxudicación do contrato de xestión do servicio público "Piscina Climatizada de Redondela" de data 14 de Abril de 1999.

2º.- Contrato administrativo asinado con Serviocio S.L. para a xestión indirecta do servicio público "Piscina Climatizada de Redondela" de data 14 de Abril de 1999, que establece na súa cláusula 3ª: "o prazo de concesión dos servicios correspondentes á piscina municipal cuberta de Redondela vai dende a data da firma do contrato, 13 de Abril de 1999, ata o 17 de Outubro de 2002, poidendo ser prorrogado, de común acordo polas dúas partes, por dous periodos máis de idéntica duración ó de vixencia inicial, segundo dispón a cláusula 6ª do prego de cláusulas económico-administrativas referente ó concepto en virtude do cal adxudicárase o contrato."

Considerando que resulta máis convinte ó interese público a apertura dun novo procedemento licitatorio para a adxudicación da concesión, mais tendo en conta a duración que require a tramitación do citado procedemento, esta alcaldía ven en

RESOLVER

Primeiro.- Que se proceda a unha modificación consensuada do prazo da prórroga previsto que se reduce de cinco anos a dez meses. Considerando que esta modificación non supón un obstáculo os principios de libre concorrência e boa fe que deben presidir a contratación das Administracións Públicas, nin se altera as bases e criterios de adxudicación do contrato, por non ampliar o prazo de duración do contrato senón por reducir o mesmo.

Segundo.- Notificar a presente resolución ó concesionario, concédendolle un prazo de dez días a efectos de que alegue o que estime oportuno.

Terceiro.- Dar conta da presente resolución ó Concello Pleno a efectos da súa ratificación."

DELIBERACIÓN:

Sr. Conde Romero: Este asunto é unha mostra máis de cómo non se deben facer as cousas. Soncoñecedores de que o contrato remataba e nembargantes non se fixo o novo contrato coa antelación suficiente.

Serie A N.º 1176162

Queremos facer unha proposta nos seguintes termos:

- Que de inmediato se proceda a iniciar novo concurso e se remate no prazo mais breve posible, contemplándose nos Pregos de Cláusulas un tempo de utilización da piscina para os clubs de water polo e natación para facer deporte, sen ter que pagar por elo e se garanten os postos de traballo existentes.

Sr. González Iglesias: O dos traballadores é obrigatorio. Comprométome a que se faga o concurso. Con respecto á utilización da piscina por parte dos clubs estaríamos discriminando se non o fixéramos así.

Poderíase optar por prorrogalo contrato pero pensamos que se obterían mais ventaxas para o Concello facendo novo concurso.

Sr. Pazos Docampo: Apoiamos a proposta. Os clubs nacen despois de adxudicarse a piscina par iso non se podían anteriormente ter en conta.

VOTACIÓN E ACORDO: O Concello Pleno en votación ordinaria e por unanimidade dos seus membros presentes, sendo vinteun votos a favor (9 do PSdeG-PSOE, 4 do BNG e 8 do PP) acorda ratificar a resolución antes transcrita.

8.-MOCIÓN DO B.N.G. SOBRE AS LISTAS DE ESPERA DO SERGAS.

ANTECEDENTES

Moción presentada en data 27 de setembro de 2002, baixo número de rexistro 6671, do Grupo Municipal do B.N.G. que transcrita di:

"Un dos problemas máis graves cos que nos enfrontamos as persoas con necesidade de atención sanitaria son as longas listas de espera ás que nos submete o SERGAS, tanto para sermos atendidas nas consultas especializadas e nas probas diagnósticas, como nas intervencións cirúrxicas e revisións. Isto ten consecuencias negativas para a saúde, como riscos vitais en determinadas patoloxías, complicacións, molestias, situacións de ansiedade, etc.

Para ir da consulta primaria á especializada a cita tarda aproximadamente 3 meses; para realizar unha proba diagnóstica, 4 meses; para dar o resultado da proba, un tempo de 4 meses e despois se se precisa intervención cirúrxica hai que agardar uns 6 meses, máis de un ano.

A espera nos centros de especialidades:

- Unha cita en xinecoloxía pode tardar até 9 ou 18 meses e nalguns casos a lista está prechada até o 2004.
- Medicina interna: 3 meses
- Reumatoloxía: 8 meses
- Traumatoloxía: 4 meses
- Endocrino: 3 meses

Tempos de espera en cirurxia:

- Traumatoloxia: 12 meses
- Xinecoloxia: 12 meses
- Cardiovascular: máis de 10 meses
- Cirurxia Xeral: máis de 11 meses

A demora para a realización de probas diagnósticas:

- Eco-cárdio: 6-9 meses
- Endoscopia: 6 meses
- Eco-xinecoloxia: 5 meses

Para camuflar a realidade o SERGAS xoga cos pacientes, servindo-se de diferentes métodos que os/as cidadáns/as non lle debemos tolerar:

- Que chamarán por teléfono as persoas afectadas, xa que naquel momento a lista está pechada.
- Acudir ao/á médico/a cunha cita e non pode ser atendida, xa que ese día o/a facultativo/a está ocupado noutras consultas.

O fin destas manobras é agochar o incumprimento que se está a facer das recomendacións do Consello Interministerial sobre as litas de espera e encobrir as verdadeiras dimensións das litas existentes.

Por outra banda, o incremento das litas de espera é un síntoma que amosa os efectos que conleva a política sanitaria privatizadora emprendida pola Xunta de Galicia. A constante transferencia de recursos e financiamento públicos cara o sector privado, favorecendo a extensión dos concertos sanitarios, reduce as posibilidades de maior eficiencia e eficacia na xestión do SERGAS, que ve diminuídas as dotacións económicas para aumentar medios persoais e materiais e contribuir dese xeito a ofrecer mellores servizos sanitarios aos/ás cidadáns/as.

É preciso que a sociedade se comprometa na defensa da Sanidade Pública, único modelo sanitario capaz de garantir o dereito á saúde de todas as persoas, e lle esixa ao Goberno galego solución aos problemas da nosa Sanidade e unha maior aposta polo carácter público do financiamento e provisión do servizos sanitarios. Por iso, o Grupo Municipal do BLOQUE NACIONALISTA GALEGO solicita do Pleno da Corporación Municipal a adopción dos seguintes

ACORDOS

1).- Esixir da Xunta de Galiza:

- a) Que se fixen os tempos máximos das litas de espera segundo a pataloxia, tanto para a consulta, probas de diagnose, intervención cirúrxicas, etc., conforme ao protocolo da Comisión Interministerial e ás recomendacións da OMS.
- b) Que adopten as medidas necesarias para que, tanto na rede Primaria como na Especializada, os usuarios e usuarias poidan solicitar a inclusión inmediata na lista de espera, impedindo a actual desculpa das listas pechadas.

Serie A N.º 1176163

- c) Que o/a paciente sexa incluído/a na lista de espera de revisión no período que sexa estimado polo/a especialista.
- d) Que baixo ningún concepto se superen os tempos de espera establecidos e que se asegure a atención inmediata á persoas que supere o tempo establecido. Criando-se, para este fin en cada área sanitaria, un Servizo de Control de listas que, en caso de incumprimento, arbitrará as medidas necesarias para que o/a paciente sexa atendido/a de xeito inmediato.

2).- Dirixir o presente acordo ao Parlamento Galego e Xunta de Galiza.”.

DELIBERACIÓN:

Sr. Pazos Docampo: A realidade das listas non é igual en toda-las zonas do País. En algúns sitio é gravísima, sendo polo tanto unha situación preocupante. Os datos que da o Sergas son intelixibles e negan a evidencia, solucionando o Sergas o tema das listas de espera ignorándoas. Solicito o apoio da Corporación a moción presentada.

Sr. Conde Romero: A Saúde e a Cultura son aspectos fundamentais e o Sergas non está dando o servizo que os cidadáns se merecen, polo tanto vamos apoiar a moción.

VOTACIÓN E ACORDO: O Concello Pleno en votación ordinaria e por unanimidade dos seus membros presentes, sendo vinteun votos a favor (9 do PSdeG-PSOE, 4 do BNG e 8 do PP) acorda aprobar a moción antes transcrita.

9.-MOCIÓN DO B.N.G. SOBRE O ATAQUE DOS EEUU AO IRAQUE

ANTECEDENTES

Pola Presidencia dase conta da moción presentada polo Grupo Municipal do BNG, en data 27 de setembro de 2002, baixo número de rexistro de entrada 6672, en relación o ataque dos EEUU ao Iraque, que transcrita dí:

“O goberno de EEUU, despois de completar a campaña militar en Afganistán, comenzo a espallar o seu propósito de atacar a Iraque.

Na últimas semanas esa intención xa se fixo pública e notoria, manifestando ademais que o obxectivo prioritario da acción militar é a de mudar o goberno dese Estado, para establecer outro que responda aos seus intereses, de xeito similar ao acontecido en Afganistán.

A actuación de EEUU responde en exclusiva aos seus propios intereses políticos, económicos e xeoestratéxicos; apostando cada vez máis por unha acción unilateral á marxe da opinión dos Organismos internacionais e dos restantes Estados, que vulneraría as regras que rexen no Dereito internacional desde despois da II Guerra Mundial, e suporía unha desautorización da Organización das Nacións Unidas. Malia a gravidade desta actuación á marxe da comunidade internacional, o Presidente do goberno español xa se apresurou a amosar o seu apoio incondicional e sen matices ás pretensións estadounidenses, denotando unha falta de iniciativa política propia para

abordar a solución ao contencioso por vías pacíficas, e ao mesmo tempo, aprofundando na submisión e aliñamento no bando máis belicoso e entreguista dos EEUU, xunto a Berlusconi ou Blair.

O posíbel ataque militar de EEUU sobre un Estado soberano como Iraque, sen ter demostrado graves vulneracións ou ameazas por parte dese país ao equilibrio internacional, e sen contar coa lexitimación da ONU, ven a reforzar o papel estadounidense de garante da orde mundial a fin de manter o seu estatus de primeira potencia mundial, e de subordinación dos restantes países aos seus intereses. Por iso, pon-se en funcionamento a acción militar sen ter en conta as graves repercusións que terá sobre a poboación civil de Iraque, xa moi empobrecida debido a un embargo internacional que dura máis de dez anos, cuxo saldo actual é a morte de centos de miles de seres humanos.

O BNG, reiterando a súa vontade de colaboración na construción mundial de povos libres e relacións internacionais baseadas na paz e igualdade, rexeita a inxerencia que os EEUU pretenden realizar no Iraque de forma violenta, e a súa teimuda política imperialista que atenta contra a soberanía das nacións do mundo.

As institucións deben facer-se eco destas reflexións ante a imenencia das accións militares, e impulsar unha concienciación cidadá que rexeite esta nova agresión militar a Iraque, e apoie o emprego de iniciativas diplomáticas por parte de toda a comunidade internacional no seu conxunto baixo a cobertura da ONU, para procurar dar unha solución pacífica a este conflito na perspectiva de defender a soberanía do Iraque face ao poderío militar estadounidense, preservar os dereitos humanos e evitar unha confrontación armada que castigue a milleiros de cidadáns inocentes.

Para isto, o Grupo Municipal do BLOQUE NACIONALISTA GALEGO, solicita ao Pleno da Corporación Municipal a adopción dos seguintes

ACORDOS:

1.- A Corporación Municipal rexeita publicamente un ataque militar dos EEUU contra Iraque.

2.- Instar ao Congreso dos Deputados e ao Goberno do Estado español a:

a).- Opór-se nos foros e organismos internacionais a un ataque militar de EEUU a Iraque.

b).- Defender o emprego das iniciativas diplomáticas necesarias por parte da ONU para solventar por vías pacíficas o conflito entre EEUU e Iraque.

c).- Comunicar aos EEUU a negativa a permitir a utilización das bases situadas en territorio español ou do espazo aéreo do Estado español dentro dunha campaña de ataque militar a Iraque.

3.- Participar e apoiar institucionalmente os actos convocados para manifestar o rexeitamento social dun ataque militar a Iraque.

Serie A N.º 1176164

4.- Dar traslado deste acordo ao Parlamento Galego para que a súa vez inste neste termos ao Goberno do Estado.

DELIBERACIÓN:

Sr. Pazos Docampo: A moción está clara. Trátase dunha guerra que responde en exclusiva ós propios intereses políticos e económicos dos E.E. U.U.. O procedemento para resolve-la cuestión pacificamente pasa a través do diálogo, sen que os argumentos de tipo legal sirvan como xustificante para masacrar unha poboación, como xa se fixo anteriormente.

Sr. Conde Romero: Nesta cámara nadie está capacitado para facer unha valoración adecuada do conflito. Segundo a prensa Irak ampara en certa medida ó terrorismo. Non teño coñecementos nin elementos de xuízo para decidir se o que di a moción é certo ou non.

Sr. González Iglesias: Determinada prensa de E.E. U.U. acusa o Presidente deste país de mentir. Os intereses que moven a guerra son de carácter económico. Non estamos de acordo cunha acción de carácter unilateral, debendo esgotarse toda-las medidas diplomáticas para solventa-lo conflito por via pacífica.

VOTACIÓN E ACORDO: O Concello, Pleno por maioría de votos, sendo trece votos a favor (9 PSdeG-PSOE, 4 BNG), e oito abstencións (PP) acorda prestarlle a súa aprobación á moción antes transcrita.

ASUNTOS FORA DA ORDE DO DÍA

A) FIXACIÓN DE PARAMETROS URBANÍSTICOS

VOTACIÓN URXENCIA

O Concello Pleno, por unanimidade de todos os seus membros presentes, sendo vinteun votos a favor (9 PSdeG-PSOE, 4 BNG e 8 PP) acorda a declaración de urxencia deste asunto.

ANTECEDENTES

Proposta do Presidente da Comisión Informativa de Urbanismo de data 18 de outubro de 2002, dictaminada favorablemente pola indicada Comisión con data 22 do referido mes e ano, que transcrita dí:

"Con data 5 de abril de 2002 tivo entrada neste Concello escrito presentado por D. FIDEL MARTÍNEZ GIL, na súa condición de representante legal de AUTOS GONZALEZ, SL, domiciliado na r/Areal, 58 - 60, 1º A, Vigo, manifestando que son titulares dunha concesión de servizo público de transporte de viaxeiros con liñas Vigo-Redondela-Berducido e Redondela-Cuvi e que con data 22 de febreiro de 2002 presentaron neste Concello un anteproxecto tendente á construción dunha nave gardería-aparcamento de autocares en terreos propiedade de RENFE sitios nas proximidades da estación de Redondela, en terreo cualificado como "zona de servizos

urbanos que precisa previamente do establecemento de parámetros urbanísticos, na súa virtude solicita se proceda a súa fixación de acordo coas determinacións que figuran no anteproxecto presentado.

Vistos os informes técnicos e xurídicos obrantes no expediente que, parcialmente e sen nada desvirtuante no omitido, din:

Informe arquitecto:

- 4.2.- Según as NN.SS, Aº 69, a zona de servicios urbanos está reservada para usos públicos que polo seu tamaño e localización necesitan características propias. O Concello fixará as condicións urbanísticas en cada caso. Os usos son: gasolineras, centros de pesaxe, ITV e mantemento de estradas.
- 4.3.- A actividade solicitada, se ben non está entre as citadas polas NN.SS, si é compatible con elas.
- 4.4.- Como non se fixan parámetros urbanísticos, se o Concello aproba o anteproxecto está facendo uso da súa potestade para fixalo.
- 4.5.- O anteproxecto presentado cumpre coas ordenanzas de uso industrial para outras zonas do municipio.
- 4.6.- Toda a actividade industrial debe desenrolarse dentro da nave que no seu día se constrúa, destinando a parte exterior exclusivamente a aparcamento, pois o contrario podería provocar molestias.

Informe secretaria :

O título VI das vixentes Normas Subsidiarias que regulamenta as "condicións xerais de edificación", inclúe o artigo 69 relativo a zona de servicios urbanos, no que se dipón: "corresponde esta ordenanza a zonas reservadas para a instalación de servicios urbanos de uso público que polo seu tamaño, necesidades de localización e características de funcionamento podían estar incluídas dentro de calquera clase de terreo non protexido especialmente.

Usos: gasolineras, centros de pesaxe, inspección técnica de vehículos e mantemento de estradas.

Nestas zonas e para cada servicio que o demande, o Concello fixará as condicións de volume, uso e xestión que resultarán axeitadas para o obxectivo proposto de conformidade coa lexislación específica de cada caso. Non podendo situarse en calquera caso a mais de 50 metros de profundidade dunha estrada de primeiro orde (CN-550)".

Visto o citado artigo, o Concello procederá á fixación das condicións de volume, uso e xestión mediante a aprobación da correspondente Ordenanza. A este respecto os artigos 47.1, 49 e 70 .2 da Lei 7/85, de 2 de abril, establecen que a aprobación das Ordenanzas locais axustarase o seguinte procedemento:



Serie A N.º 1176165

- Aprobación inicial polo Pleno por maioría simple.
- Información pública e audiencia ós interesados polo prazo mínimo de trinta días para a presentación de reclamacións e suxerencias.
- Resolución de tódalas reclamacións e suxerencias presentadas dentro de prazo e aprobación definitiva polo Pleno por maioría simple. No caso de que non se tivera presentado ningunha reclamación ou suxerencia, entenderase definitivamente aprobado o acordo ata entón provisional.
- Publicación do texto íntegro da Ordenanza no Boletín Oficial da Provincia, e no taboleiro de edictos do Concello

Con base nos antecedentes expostos, emitese informe favorable á fixación dos parámetros urbanísticos na zona de servicios urbanos de conforminde co procedemento descrito.

O concelleiro que subscribe somete ó asunto á Comisión de Urbanismo co fin de que se emita dictame favorable e se eleve proposta ó Concello pleno no sentido de **aproba-lo establecemento dos seguintes parámetros urbanísticos:**

Ambito de aplicación: Zona de servicios urbanos- estación, A Portela-Cedeira, según se indica no plano adxunto.

Superficie parcela: Parcela mínima 1.000 m²; parcela máxima 1.500 m²

Usos permitidos: Instalación de servicios urbanos de uso público: Gasolineira, centros de pesaxe, inspección técnica de vehículos, garaxe-aparcamento, estacionamento vehículos, mantemento de estrada, así como aqueles usos complementarios e/ou compatibles con estes.

Usos prohibidos: Residencial e industrial

Tipoloxía edificación: Nave illada

Condicións estéticas: Pedra, enfoscados pintados en cores da zona, paneis prefabricados de fachada, bloques cerámicos e de morteiro con acabados de fachada. Tella cerámica, placas metálicas lacadas.

Prohibense bloques, revestimentos cerámicos e placas de fibrocemento vistas.

Na parcela libre de edificación non se permite máis que o estacionamento/aparcamento de vehículos, prohibíndose a execución de calquera outra actividade ó aire libre

Ocupación máxima en planta	15,17%
Volume máximo	1060 m ³
Edificabilidade	0,76m ³ /m ²
Altura máxima a cumbrera	5,5 ml

Retranqueos a camiños

9ml ó eixo

Retranqueos a lindeiros

5 ml

O aproveitamento urbanístico que se urbanos derive da aplicación dos anteriores parámetros á parcela obxecto do presente expediente, será tido en conta para os efectos de computo do aproveitamento total que se fixe nunha futura actuación urbanística, ou no futuro planeamento, ós terreos propiedade de RENFE comprendidos na zona delimitada nos planos das NN.SS como "zona de servicios urbanos".

Normativa e ordenanzas complementarias: A normativa xeral establecida nas Normas Subsidiarias de ámbito municipal publicadas no BOP nº 85 de 14-4-1988 e a ordenanza para o solo urbano residencial establecida no artigo 55 das citadas normas.

Xestión: Por tratarse dun solo urbano onde non é preciso o desenvolvemento de actuacións de execución integral non se establecen normas específicas de xestión urbanística quedando sometido este ámbito ó réxime establecido no artigo 70 da Lei 1/1997, de 24 de marzo, do Solo de Galicia

VOTACIÓN E ACORDO: O Concello, Pleno por maioría de votos, sendo vinteun votos a favor (9 PSdeG-PSOE, 4 BNG e 8 PP), acorda prestarlle a súa aprobación á proposta antes transcrita.

B).- DECLARACIÓN INSTITUCIONAL CON MOTIVO DA CELEBRACIÓN DO DÍA INTERNACIONAL DA VIOLENCIA CONTRA AS MULLERES

VOTACIÓN URXENCIA

O Concello Pleno, por unanimidade de todos os seus membros presentes, sendo vinteun votos a favor (9 PSdeG-PSOE, 4 BNG e 8 PP) acorda a declaración de urxencia deste asunto.

ANTECEDENTES

Declaración institucional con motivo da celebración do día internacional da violencia contra as mulleres, que transcrita dí:

"O día 25 de novembro foi declarado "Día internacional da non violencia contra as mulleres".

A violencia de xénero é un fenómeno que non só non diminúe senón que está arraigado en moitos sectores da nosa sociedade independentemente do país, idade, cultura, clase social, relixión ou etnia e constitúe a primeira causa de morte das mulleres no mundo.

A ONU define este tipo de violencia como: "Todo acto de violencia baseado na pertenza de xénero feminino que ten ou pode ter como resultado dun dano ou sufrimento físico, sexual ou psicolóxico para a muller, así como as ameazas de tais actos, a coacción ou privación arbitraria de liberdade tanto se se produce na vida pública como na privada. É unha violación dos dereitos humanos e das liberdades fundamentais e

Serie A N.º 1176166

constitue unha manifestación das relacións de poder historicamente desiguais entre homes e mulleres que conduciu á dominación da muller e á súa discriminación. É un dos mecanismos sociais fundamentais polo que se forza á muller a unha situación de subordinación con respecto ao home".

A violencia contra as mulleres non é un feito que deba ficar na esfera do privado senón que é un grave problema social e como tal compete a toda a sociedade. Nos cinco primeiros meses do ano, na Galiza, 5 mulleres morreron vítimas dos maos tratos e 479 cursaron a pertinente denuncia. Estas denuncias son unha pequena mostra da realidade pois sabemos que só se denuncian entre o 5 o 10% dos casos reais.

Esta Corporación Municipal fai un chamamento á cidadanía do noso concello para que non tolere nen un minuto máis a violencia contra as mulleres e que a súa erradicación se converta nun obxectivo prioritario.

Asimesmo demandamos dos poderes públicos e dos gobernos medidas urxentes encamiñadas á prevención e á educación da sociedade para acabar cos estereotipos sexistas que conducen á desigualdade, ao dominio dun sexo sobre outro e a asumir que as relacións de igualdade entre os xéneros e o respecto mútuo son fundamentais para acabar con esta tremenda carga social.

De igual forma demandamos medidas encamiñadas á atención e protección das vítimas para que se atrevan a romper co silencio e denunciar aos seus agresores e que se axude a paliar a súa situación e a encarar o seu futuro.

Esta Corporación Municipal, como símbolo de compromiso contra a violencia de xénero fará un minuto de silencio cada vez que se produza unha morte por maos tratos."

VOTACIÓN E ACORDO: O Concello, Pleno por unanimidade de todos os seus membros presentes, sendo vinteun votos a favor (9 PSdeG-PSOE, 4 BNG e 8 PP), acorda prestarlle a súa aprobación á declaración antes transcrita.

ROGOS E PREGUNTAS.

Non se formularon.

E, non habendo máis asuntos que tratar, pola Presidencia dase por rematada a presente sesión, sendo as vinte horas e cincuenta e oito minutos da data fixada no encabezamento en proba de todo o que, se estende a presente Acta, que se inscribiu no Libro dende o folio setenta e tres do Papel Timbrado da Comunidade Autónoma de Galicia, Serie A nº 1176160, ata o folio setenta e nove, Serie A nº 1176166, de todo o que como Secretaría do presente acto, dou fe.

O Alcalde

O Secretario, Acctal

Asdo: Xaime Rei Barreiro

Asdo: Benardo Soto López



NUMERADO
CORPORACIÓN
MUNICIPAL